

Powšitkowne WOZJEWJENJA

njedźelu, 20. decembra 2020

Wusylanje Božich mšow, koncerta a dalšeho wokoło hód

Serbskorěčnu Božu mšu móža wěriwi tutu njedźelu, 20. decembra, kaž tež hodowne swjate dny ZNOWA jako livestream w interneće sčehować. Dopoldnja w 9 hodź. přenjesu so wona z Chróšćanskeje, dalša hižo we 8.30 hodź z Kulowskeje cyrkweje. Kemše w Božej nocy, 24. decembra, w 22 hodź. přenjesu so z Chrósćic, z Kulowa hižo w 19.30 hodź. Z Chrósćic wusyła so kemše w Božej nocy tohorunja w Serbskim rozhłosu. Boži dzeń a naslědne swjate dny a njedźele, 25., 26. a 27. decembra, 1. a 3. januara, přenjesu so kemše stajnje w 9 hodź. z Chróšćanskeje a we 8.30 hodź. z Kulowskeje cyrkweje, wottam tež srjedu, 6. januara, we 8.30 hodź.

Wjacore aktiwity na nabožnym wobłuku su wokoło hód planowane. Štóž chce, móže link na swoje regionalne zarjadowanje redakciji na e-mail Katolski@Posol.de sprosředkować, zo by so wón kaž tež tamne linki na internetowej stronje www.posol.de wozjewił, na přikład film Róžeńčanskich džěci. Nimo toho je njedźelu, 3. januara, w 14 hodź. duchowny koncert planowany, kotryž móže so online sčehować. Linki su pod www.posol.de podate.

Přiležnosć k swjatej spowědźi w Róžeńće

W Róžeńće budže wutoru, 22. decembra, wot 18.30 do 19.30 hodź swjata spowědź. Spowědnicy su farar Michał Anders w kapale, farar Šćěpan Delan na chórje a farar Gerat Wornar we wěži. Sobotu, 2. kaž tež 9. januara, tam swjateje spowědže njebudže.

Adwentny nyšpor w swójbje swjećić

Worklečanske džěćace dekanatne dušepastyrstwo je za kóždu adwentnu njedźelu nyšpor spřihotowało, kotryž móže so w swójbje swjećić. Namjet wotběha budže aktualnje na internetowej stronje www.posol.de wozjewjeny.

Kubłanski personal w Radworju trěbny

Katolski serbski džěćacy dom „Alojs Andricki“ w Radworju pyta kubłarku abo kubłarja za městno dotalnej kubłarki, kotraž je so na wuměnk podała. Městno ma so tak spěšnje kaž móžno wobsadzić. Štóž ma zajim abo prašenja, njech so na wjednicu Andreju Henichowu pod telefonowym čisłom (03 59 35) 2 07 17 abo z mailku andritzki.kinderhaus@t-online.de wobroći.

Zymska akademija jenož online

Lětuša Zymska akademija pod hesłom „Swědčenje w času – Dynamika křesćanskeho w Drježdžansko-Mišnjanskim biskopstwje“ přewjedže so wot srjedy do soboty, 6. do 9. januara, jeničce digitalnje. Při tym póndže mjez druhim wo stawizny diecezy, ale tež wo dynamiku diaspory, wo liturgiju, wo cyrkej w digitalnym swěće, wo katolicizm runje tak kaž wo ekumenu w přichodže. Wobšěrny program je pod www.posol.de wozjewjeny, zdobom móžnosć přizjewjenja.

Kemši do Róžanta k hodam so přizjewić

W Róžeńčanskej cyrkwi su lisćiny wupołożene, do kotrychž měł so kóždy zapisać, kiž chcył so tam na Božich mšach k hodownym swjatym dnjam wobdźělić. Koronoweje pandemije dla smě jenož 110 wosobow na raz do Božeho domu. Štóž njeje w lisćinje zapisany, njemóže kemše hody bohužel w cyrkwi sobu swječić, je-li maksimalna ličba kemšerjow docpěta. Před Božim domom budže to přiwšěm móžno. Kemše w Róžeńće budu w Božej nocy, štwórtk, 24. decembra, w 20 hodź., Boži dzeń, na swjateho Šćěpana a njedželu Swjateje swójby, 25., 26. a 27. decembra, stajnje w 9.00 hodź. w serbskej a w 10.30 hodź. w němskej řeči.

Nowa plaćizna

Po wosom lětach so plaćizna za Katolski Posoł wob lěto wo dwaj euraj zwyżi. Wot 2021 wučinja lětny abonement 27 eurow, z póstom 54 eurow.

TCM podpěra dušepastyrski projekt fararja dr. Dzikiewicza

Dary za Pólsku hromadza so hakle klětu

Towarstwo Cyrila a Metoda z.t. (TCM) chce ze swojej akciju „Łužica pomha“ tónkróc projekt fararja dr. Daniela Dzikiewicza, kotryž je dobre džewjeć lět w Chrósćicach skutkował, financielnje při twarje wosadnicy we Wojdatach podpěrać. Tu trjeba wón, zo by w swojej wosadze z mnohimi młodymi swójbami – lětsa mějachu 80 přenjowoprawjenskich džěci a runje telko křćeńcow – porjadnje pastoralnje skutkować móhł. Wobšěrnje je projekt w Katolskim Posole z 25. oktobra wopisany. Pjenježne dary móža so na konto Cyrill-Methodius-Verein e.V., IBAN: DE 65 750 90 300 000 828 23 66, pod hesłom „Litawska“ přepokazać. Štóž sej darowansku kwitowanku přeje, měł swoju dospołnu adresu zdźělić, dokelž njesteji wona na přepokazance. Předsyda TCM Jurij Špitank skedźbnja na to, zo towarstwo w akciji „Łužica pomha“ koronoweje krizy dla lětsa nazymu za Pólsku dary njehromadzi, kaž je wone to zašle lěta činiło. Dalokož móžno, ma so to klětu nalěto nachwatać.

W Hejnicach trjebaja pomoc

Na zakładze wuskutkow tuchwilneje koronoweje pandemije je situacija w klóštrje w čěskich Hejnicach jara napjata, wšako njejsu tam žanežkuli zarjadowanja móžne. Podobnje Smochčanskemu kubłanišću swjateho Bena wužiwa so klóšter jako kubłanski a putniski centrum a leži na kromje Jizerskich hór. W Čěskej pak njedóstawaju tajke kubłanske domy kaž w Němskej statnu a cyrkwinu podpěru. Pod třěchu Ekumeniskeho tachantskeho wobchoda z.t. (Ökumenischer Domladen Bautzen e.V.) eksistuje nětko Kruh přećelow a podpěraćelow Hejničanskeho klóštra. Štóž chce čěski kubłanski dom rady podpěrać, móže swój dar na towarstwowe konto tachantskeho wobchoda pola Ludoweje banki Drježdžany-Budyšin pod hesłom Kloster Haindorf přepokazać: IBAN DE33 8509 0000 5626 2110 05. Darowanske kwitowanki towarstwo wustaja. Wšitke pjenježne dary přepoda wone direktnje do Hejnic. Znaty a woblubowany je klóšter tež w Serbach. Hižo časćišo putnikowachu wěriwi z Łužicy do tamnišeje hnadowneje cyrkwyje. Mnohe lěta přewjedžechu w kubłanskim domje tež serbske chóry swoje probowe lěhwa, wosebje prawidlownje přebywaše tam chór Budyskeho Serbskeho gymnazija.